



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2016. GODINU HRVATSKE KRŠĆANSKE DEMOKRATSKE UNIJE BOSNE I HERCEGOVINE

Broj: 03-07-6-637/17
Sarajevo, 30.03.2018. godine

SADRŽAJ

MIŠLJENJE REVIZORA.....	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE	5
5.1 NALAZI.....	5
5.2 PREPORUKE	7

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Hrvatske kršćanske demokratske unije Bosne i Hercegovine i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15. Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2016. godinu, utvrđeno je da je Hrvatska kršćanska demokratska unija Bosne i Hercegovine prekršila odredbe člana 11. stav (1) i člana 12. stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Hrvatske kršćanske demokratske unije Bosne i Hercegovine za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska kršćanska demokratska unija Bosne i Hercegovine se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	1,03	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	1.200,00	2,07
7.	Prihodi iz budžeta (3-f)	53.786,82	92,77
8.	Prihodi od propagande (3-g)	0,00	0,00
I	Ukupni prihodi (1-8)	54.987,85	94,84
II	Ostali prihodi i drugo	2.990,03	5,16
	Izvori finansiranja (I+II)	57.977,88	100,00

U godišnjem finansijskom izvještaju stranka je iskazala ukupne rashode u iznosu od 23.766,00 KM.

2. PREDSTAVLJANJE POLITIČKE STRANKE

Naziv političke stranke: Hrvatska kršćanska demokratska unija Bosne i Hercegovine. Skraćeni naziv stranke je HKDU BiH.

Politička stranka je upisana je u registar kod Županijskog suda u Livnu, rješenjem broj: R-I-7/96 od 14.06.1996. godine, dok su rješenjima Općinskog suda u Mostaru broj: R/3-09 od 26.10.2009. godine i broj: R/5-14 od 08.12.2014. godine upisane izmjene podataka o licu ovlaštenom za zastupanje i predstavljanje stranke.

Sjedište stranke je u Mostaru, Dr. Mile Budaka br. 126.

Lice ovlašteno za predstavljanje i zastupanje stranke je Ivan Musa, predsjednik.

Lice ovlašteno za podnošenje finansijskih izvještaja za 2016. godinu je Ivan Musa.

Prema podacima iz godišnjeg finansijskog izvještaja za 2016. godinu, Hrvatska kršćanska demokratska unija Bosne i Hercegovine ima sljedeću organizacionu strukturu:

- Glavni odbor i
- 16 općinskih odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske kršćanske demokratske unije Bosne i Hercegovine za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama poglavlja 15. Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je ostvarila troškove izborne kampanje u okviru zakonom utvrđenog limita.

Obim pregleda i kontrole finansijskih izvještaja Hrvatske kršćanske demokratske unije Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled, kontrolu i reviziju finansijskih izvještaja Hrvatske kršćanske demokratske unije Bosne i Hercegovine u periodu od 2007. do 2015. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda finansijskog izvještaja za 2015. godinu, izdat je izvještaj o pregledu sa mišljenjem revizora, nalazima i preporukama stranci da uspostavi tačne evidencije o obavezama u svojim poslovnim knjigama i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Hrvatska kršćanska demokratska unija Bosne i Hercegovine nije ispoštovala date preporuke.

5. NALAZI I PREPORUKE

5.1 NALAZI

Hrvatska kršćanska demokratska unija Bosne i Hercegovine prekršila je odredbe člana 11. stav (1) i člana 12. stav (4) Zakona o finansiranju političkih stranaka.

Pregledom godišnjeg finansijskog izvještaja i dodatne finansijske dokumentacije, utvrđeno je da je Hrvatska kršćanska demokratska unija Bosne i Hercegovine u poslovnim knjigama iskazala nepostojeće obaveze i nije popunila godišnji finansijski izvještaj za 2016. godine u skladu sa odredbama Pravilnika o godišnjim finansijskim izvještajima političkih stranaka-u daljem tekstu: Pravilnik, čime je prekršila odredbe člana 11. stav (1)¹ i člana 12. stav (4) Zakona o finansiranju političkih stranaka.

¹ Politička stranka dužna je voditi poslovne knjige i podnositi finansijske izvještaje na način koji je utvrđen zakonom i drugim propisima u skladu sa zakonom.

- (1) Hrvatska kršćanska demokratska unija Bosne i Hercegovine je u obrascu 3-f (prihodi iz budžeta) iskazala prihode iz budžeta Federacije Bosne i Hercegovine u iznosu od 48.704,82 KM.

Kontrolom izvoda sa transakcijskog računa stranke, utvrđeno je da je stranka iz budžeta Federacije Bosne i Hercegovine primila sredstva u iznosu od 37.454,82 KM, te da je iz budžeta Zapadnohercegovačkog kantona primila sredstva u iznosu od 11.250,00 KM.

S obzirom da nije u obrascu 3-f pravilno iskazala prihode koje je ostvarila iz budžeta, stranka je prekršila odredbe člana 19. Pravilnika.

- (2) Uvidom u poslovne knjige i dodatnu finansijsku dokumentaciju, utvrđeno je da Hrvatska kršćanska demokratska unija Bosne i Hercegovine na dan 31.12.2016. godine ima obaveze po osnovu zajma prema pravnom licu „Alpen-Mit“ d.o.o. Široki Brijeg² u iznosu od 59.079,82 KM, koje je iskazala u obrascu 5.2 (ostale obaveze) godišnjeg finansijskog izvještaja, čime je prekršila odredbe člana 24. Pravilnika.

Stranka je imala obavezu da u obrascu 5.1 (obaveze političke stranke po kreditima i pozajmicama) godišnjeg finansijskog izvještaja iskaže obaveze po osnovu zajma prema pravnom licu „Alpen-Mit“ d.o.o. Široki Brijeg u iznosu od 59.079,82 KM.

Osim navedenog, uvidom u poslovne knjige utvrđeno je da je stranka tokom 2016. godine otpisala obaveze prema dobavljaču „Kora-Fin“ d.o.o. u iznosu od 2.409,00 KM, te da na dan 31.12.2016. godine prema ovom pravnom licu ima obaveze u iznosu od 1.000,00 KM.

Na zahtjev Centralne izborne komisije Bosne i Hercegovine da dostavi izvod otvorenih stavki na dan 31.12.2016. godine za dobavljača-pravno lice „Kora-Fin“ d.o.o., Hrvatska kršćanska demokratska unija Bosne i Hercegovine je dostavila dopis u kojem je obavijestila Centralnu izbornu komisiju Bosne i Hercegovine da nije u mogućnosti da dostavi traženi izvod jer ovo pravno lice više ne posluje, što je, takođe, konstatovano i u Izvještaju o pregledu godišnjeg finansijskog izvještaja za 2015. godinu.

S obzirom da stranka ima saznanja da pravno lice „Kora-Fin“ d.o.o. više ne posluje, smatramo da je u poslovnim knjigama i godišnjem finansijskom izvještaju za 2016. godinu iskazala nepostojeće obaveze.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM³ po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Hrvatska kršćanska demokratska unija Bosne i Hercegovine je u svrhu izborne kampanje mogla da potroši sredstva u iznosu od 64.680,33 KM.

Hrvatska kršćanska demokratska unija Bosne i Hercegovine je u godišnjem finansijskom izvještaju za 2016. godinu i postizbornom finansijskom izvještaju – Lokalni izbori 2016. godine iskazala troškove propagande u iznosu od 19.756,55 KM.

² Ugovor o ustupanju potraživanja (ugovor o cesiji) od 03.08.2016. godine.

³ Član 15.10 stav (2) Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2 PREPORUKE

Preporučuje se Hrvatskoj kršćanskoj demokratskoj uniji Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da vodi poslovne knjige i podnosi finansijske izvještaje na način koji je utvrđen zakonom i drugim propisima u skladu sa zakonom, odnosno da uspostavi tačne evidencije o obavezama u svojim poslovnim knjigama i*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku, Hrvatska kršćanska demokratska unija Bosne i Hercegovine nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2016. godine.

Šef Odsjeka za revizijske poslove, revizor

Sanja Tošović

Šef Službe za reviziju

Mr.sc Hasida Gušić